



### La dumonda è cun u senza Savognin

La cumissiun per il project da fusiun dals cumins-baselgia Surses ha envidà ad in'infurmaziun.

19



südostschweiz

# LA QUOTIDIANA

Redacziun: Via Sommerau 32, 7007 Cuira, tel. 081 255 57 10, redacziun@laquotidiana.ch

## Scolars han mirau davos las culissas

■ (anr/fal) Duront in entir di han la 4.–6. classa da Schluain saviu fuffergnar davos las culissas dil Hotel Stern a Cuera. Quei ei stau pusseivel grazia al project «Rock the Grischa» clamaus en veta da turistichers dil Grischun. Aschia han las scolaras ed ils scolar giu la caschun d'emprerder d'enconuscher differentas clamas dalla hotellaria e dalla gastronomia, quei cun far lavurs praticas e cun haver il contact direct cun glied dil fatg. Igl ambassadur da «Rock the Grischa» ei Richard Decurtins da Gastrosuisse che vesa quei project sco gronda schanza, ton pils scolaras sco era pil turissem grischun. Ils affons ein era vegni informai en general davart il turissem en nies cantun.

> PAGINA 6

## Investos vignan 14 milliuns francs

■ (anr/gns) Igl cunsegl communal da Vaz ò approvo unanim per mangs dall'urna igl messadi dalla revisiun parziala dalla planisaziun locala a «Canols». Schinavant tgi igl suveran da Vaz fo chella midada survign Lai en nov hotel. Las dus persungas tgi investeschon 14 milliuns francs pigl «Yolo» hotel on igls davos onns fatg pulitas investiziuns a Lai. Igl èn chegl igls frars Remo e Philipp Bienz, els tgi on gio investo 75 milliuns francs pigl hotel «Privà Alpine Lodge» ed alloura vers org milliuns per ena tgesa da persunal a «Canols». Igl nov hotel cun prietschs per permottar ainten en segment pi bass cumpeglia 96 tgombras cun 220 anfignen 230 letgs. Gio igl avost da chesta stad duess esser l'amprema badigleida.

> PAGINA 17

## Tener la glied a Castrisch

La vischnaunca Ilanz/Glion s'engascha per ina zona per indigens

DAD AUGUSTIN BEELI / ANR

■ Ellas biaras regiuns dat ei marcaus che rimnan ils vitgs entuorn els sco clutschas ils pluscheins. Aschia era en Surselva. La vischnaunca Ilanz/Glion sesprova denton era da tgirar ils pluscheins. Sper autras caussas d'impurtonza ein las autoritads communalas dad Ilanz/Glion fatschentadas actualmeins culla planisaziun locala. Gia dapi che la fusiun ei ida en vigur avon dus onns eis ei stau clar ch'ins sto harmonisar las leschas da baghegiar da 12 vitgs ed in marcau. Las autoritads san perquei denton buca decretar in scamond da baghegiar e da sesviluppar. Aschia han differentes investurs privats mussau igl onn vargau in grond activissem. Rodund 100 habitaziuns dueigi dar il proxim futur a Glion. Cugl argument ch'ei seigi pli attractiv da viver en in center che ora en in vitg senza veta emprov'ins da vender ni affittar quei spazi d'habitar. La vischnaunca Ilanz/Glion sesprova da sia vart da promover ina cuntertendenza: Aschia vul ella arver a Castrisch ina



Glion (seniester) e Castrisch (dretg) ein colligiai cun ina attractiva via da velos e pedunzs.

FOTO A. BEELI

gronda zona d'habitar per indigens. La glied enqueri tuttavia aunc plazs da baghegiar ora silla tiara e buca mo el center, confir-

man las autoritads dad Ilanz/Glion. Denter ils quartiers Padrus e Fistez ha la vischnaunca Ilanz/Glion surpriu ella dotta da mari-

daglia ina gronda surfatscha ch'ei adattada sco zona per indigens.

> PAGINA 3

## Fotos veglias – era dalla Surselva

■ (anr/hh) La Fundaziun grischuna per la fotografia ha obteniu il relasch da Lisa Gensetter. La fotografa oriunda da Tavau che ha viviu da 1925 entochen 2007 ha fotografau subjects egl entir Grischun, denter auter era en Surselva. Ina part da sia relasch che cumpeglia rodund 10 000 fotografias d'aula qualitat ei da catar sin la homepage dalla fundaziun www.fo-

toGR.ch. Entochen miez avel duessen tuttas fotos esser online. Gensetter ei scolada sil sector dalla fotografia ed ha luvrau sur sesezza silsenter. La Fundaziun grischuna per la fotografia ei vegnida fundada 2013. Sia finamira ei da mantener collecziuns da fotografias da relaschs el Grischun.

> PAGINA 3

## Temas locals e globals in üna

■ (anr/fa) Als 22 marz, il Di da l'aua proclamà da l'ONU, s'haja fini a Scuol ils prüms Dis da l'aua forta. Urs Wohler, il directur da la TESSVM, accentuescha l'importanza da quists dis pel turissem regional. L'organisaziun portadra, la Pro Aua Minerala, ha organisà cul sustegn dal Turissem Engiadina Scuol Samignun Val Müstair SA, dals 16 als 22 marz ils prüms Dis da l'aua forta cun temas tant locals sco eir globals. Quels dis han rimplazzà l'Eivna da l'aua cha la destinaziun vaiva organisà i'ls ultims trais ons. «Cun l'instituziun Pro Aua Minerala vaina uossa üna basa plü vasta», declera Wohler, «quai es eir üna buna basa per l'ulterior svilup da quists dis da l'aua chi significhan ün avantag per nos turissem.»

> PAGINA 15

## L'aua pudess dvantar s-charsa

■ (anr/rgd) La finischn dals «Dis da l'aua forta» a Scuol ha fat Klaus Lanz cun ün referat. El es l'autur d'ün stüdi davart prognosas da l'aua in Engiadina. Eir schi para hozindi bod exclus cha l'Engiadina Bassa pudess subir ün di da mancanza d'aua nun es quist piser dal tuottafat malfundà. Il nouv stüdi da Lanz retschercha il connex tanter l'augmoint da la temperatura in media ed il provedimaint da l'aua in Engiadina. Cunquai cha las funtanis sun per gronda part fich dependentas da la quantità da naiv chi crouda durant l'inviern ha rendü Lanz attent cha la situaziun pudess as müdar fich svelt. «Il plü important chi's dvainta consciant cha l'aua nun es avant man sainza fin», ha dit il referent Lanz.

> PAGINA 15

## Ina nova presidenta

Vreni Caduff suonda a Bernadette Arpagaus

■ (anr/ac) A caschun dalla radunonza generala dalla mesjamna vargada a Sursaisa han las puras eligiu ina nova presidenta. Vreni Caduff surpren il presidi da Bernadette Buchli che ha exequiu quei uffeci duront sis onns. Sempla ei la tscherca dad ina successura buca stada. Quei ha

la presidenta dalla secziun dallas puras enteifer l'Uniun purila Surselva, Bernadette Buchli, tradiu la mesjamna vargada a Sursaisa. Ton pli satisfatga ei la presidenta partenta ch'igl ei reussiu dad anflar ina successura per il tgamun dallas puras sursilvanas. Cun applaus ha la radunonza dallas pu-

ras eligiu Vreni Caduff sco nova presidenta dalla secziun dallas puras sursilvanas. Ina secziun ch'ei part dall'Uniun purila Surselva e che seraduna mintga dus onns alla radunonza generala, quella ga a Sursaisa.

> PAGINA 2

## Poesias da Tuor al colloqui rumantsch

■ (anr/am) Dacurt ha Renzo Caduff preschentà sia nov'ediziun cumplessiva da las poesias dad Alfons Tuor ch'el ha edì l'onn passà. Ina tschinquantina d'amitgs da la litteratura rumantscha è vegnida a l'emprim da trais colloquis rumantschs dal semester da primavera a l'Universitad da Turig. Caduff ha tractà diversas poesias da Tuor, uschia era sia pli enconuscenta «Allas steilas». Tranter auter ha Caduff era referi davart la curta, ma fitg intensiva vita da l'autur dal 19avel tschientaner.

> PAGINA 11

## Angal en sport: Hockey

■ (anr/gns) Dantant tgi igls gis da playoffs dalla ligia naziunala A èn anc actuals vala chegl betg per igls gis da playoffs dallas ligias pi bassas e regionalas. Tar egn da chels clubs totga chel da Purtenza/Signeradi dalla 2. ligia e cun chel team gioian er dus frars da Casti. Igl terz frar tgi dat er a hockey è gist turno da curt digls Stadis Unias dall'America. Nous vagn visito igls treis cumpogns tgi veivan pigl e cugl hockey. Anc è lour avigneir sportiv intsichert.

> PAGINA 17



Vreni Caduff (sen.) surpren il presidi dallas puras sursilvanas da Bernadette Buchli (dretg).

FOTO A. CADONAU



9 771424 749004

40012

Servetsch d'abunents e da distribuziun: tel. 0844 226 226 mail: abo@somedia.ch